



致那些理所當然的人

文：強仔
排：oi

朋友之間總係希望同自己嘅伙伴有各式各樣的聚會，喺facebook,instagram中周不時都會見到自己身邊一大班朋友gathering嘅相，而到自己嘅時候，都會係呢個得來不易相聚嘅時間為自己同朋友們用相片留低呢啲咁值得回味嘅時刻。但係大家selfie緊嘅時候又有冇諗過點解會約得成今次嘅gathering呢？又知唔知搞手到底係後面做咗幾多嘢呢？

作為一個**專業搞手**，睇約人嘅時候都一定會遇見嘅幾種人：

已讀不回

喺每一個同朋友嘅whatsapp group入面都總會有啲人read咗又唔會覆你。喺未有藍tick嘅年代，搞手們仲可以欺騙自己話：可能佢未睇到所以唔覆呢。但係當whatsapp有咗藍tick呢個重大功能之後，呢啲人就無所遁形，我地可以睇到成個group入面到底邊個人read咗。可惜嘅係，就算有咗呢個功能，令到呢啲人唔可以再隱藏自己嘅身份，佢地會依然我行我素 - 唔會喺個group入面出聲。



讀取



已讀不回
年6月21日, 20:40



隱形人
年6月21日, 20:37



睇完就算
年6月21日, 20:18

是但啦
你地話事啦

無所謂
無所謂啊~

咩都得
無所謂!

「無所謂」

每次一班朋友聚會，大部分人都係話出嚟一齊食餐飯，要搞手諗晒每次依咩都好煩嘍，既然有一大班朋友一齊去既點解唔問下佢地意見呢。可能你就會以為有咁多人比意見就一定好快揀好到底食咩啦。少年你太年輕了，即使多咗人一齊諗，其實最尾又會係搞手負責拋個idea出嚟。點解會咁呢？因為每次搞手問大家想食咩嘅時候，佢地都會講「冇所謂」呢三隻字；但當搞手比完提議出嚟嘅時候，佢地又會係咁Ban你。口裏說「無所謂」三隻字，心裡面又想搞手可以講到自己想食乜。其實呢，搞手就唔會識讀心嘅。下次如果自己真係有咩想食想講就唔好要人估估下，不如自己直接啲講出嚟好過。

大忙人

其實要一大班人夾到一日可以約出嚟到係好難嘅一件事，大學五件事入面只要你有做以下呢三件事嘅其中兩件或者全部做齊晒就已經可以叫做係大忙人：住hall、上庄同埋part time。首先上庄同part time大家都會明點樣令到一個人咁忙啦，因為你會有大量庄務需要處理，而part time又可能撞正大家都得閒嘅日子。但係住hall又點影響到呢？大家諗下住hall嘅話即係多左一班hallmate或者floormate，對住佢地分分鐘仲多過屋企人，自然就親上加親啦！其實小編都係想帶出一個道理：又有多一班人會同搞手爭friend嘅availability。

「我今晚唔得啊，約左re-u 🙄」

「再約！sorry！」

「我都唔得呀，庄聚」

「我都係，sorry！下次一定到 🙌」

有heart嘅懶人

可能大家未必會遇見呢一種人，但實不相瞞，其實小編都係一個（專業）搞手，而我嘅朋友們就有一啲有心但又懶嘅人。佢地會對個gathering有好多諗頭，會提議一啲地方同大家一齊去或者試下。佢地有咁多諗頭的確係好事嘍，但個問題係佢地唔會係個group到問大家有冇興趣去做呢啲，反而係會私底下同你講佢有呢啲諗法，然後就會變咗係你嘅責任、要你去問各位大佬有冇興趣。你可以話呢一種人都幾好，起碼佢會仲有心去諗大家一齊可以做嘅咩；但係喺另一方面睇，佢又不斷增加緊搞手嘅工作量。

但以上呢四種人都唔係令到搞手最灰心最唔開心嘅人，起碼佢地都係有心想繼續維繫關係。對搞手而言，最唔想知道嘅係原來有時自己搞好晒咁多嘢，但最後都係冇人識欣賞、甚至係唔想一齊去。其實你地一句「其實我都唔係咁想嘍」真係會搞到搞手冇晒心機，因為搞手們真係落足心機去約你地出嚟，又點會估到得返嚟嘅結果會係咁呢。

有時候搞手們自己做得咁辛苦都係想大家可以有機會繼續見到大家，辛苦啲都冇所謂。希望大家可以珍惜自己身邊每一個肯為咗搞一次gathering或者re-u而做咗好多工夫嘅搞手。

